

समे – 12:25

<><><><><><>

Lok Sabha Election

102 सीटें पर कल मतदाताएं पूरे जोश कन्नै वोट पाए। उनें खेत्तरे च 62.37 फीसदी मतदान होआ ऐ। मतदान कुल मलाइयै रमानदारी कन्नै संपन्न होआ ते गर्मी दे बावजूद बी मतदाताएं वोट पाने दी अपनी जिम्मेदारी पूरे गर्व कन्नै नभाई। एह सीटां 17 राज्यें ते 4 केन्द्र शासत प्रदेशें च फैली दियां न। इस पैहले गेड़ च 1 ज्हार 625 मेदवार मैदान च हे। भारती जनता पार्टी दे वरिष्ठ नेताएं ते मंत्रिएं नितिन गडकरी, सरबानंद सोनोवाल, किरेण रिजिजू, डॉ. जितेन्द्र सिंह, संजीव बालयान ते बीजेपी दे नेता तमिलसाई साँदराजन ते जतिन प्रसाद ते कांग्रेस दे नेता गौरव गोगाई, कार्ति चिंदबरम ते नकुल नाथ ते डीएमके दे दयानिधि मारन प्रमुख मेदवारें च शामिल न, जिंदा राजनीतिक भविक्ख कल ईवीएम च बंद होई गेआ।

<><><><><><>

Udhampur Polling

दफा 370 दे हटने दे परैत केन्द्र शासत प्रदेश जम्मू कश्मीर च पैहले गेड़ दा चुनां शांतिपूर्ण ढंगे नै होआ ते मतदाताएं दी बड़ी मती गिनतरी नै अपना बसा-भरोसा लोकतंत्र च फही पक्का कीता ऐ। उधमपुर-कठुआ पार्लिमानी हल्के च बरखें दे बावजूद 68.27 फीसद मतदाताएं अपने हक्कै दा इस्तेमाल कीता जेहड़ा जे राष्ट्रीय आंकड़े 62.42 फीसद कोला मता ऐ। आकाशवाणी जम्मू संवाददाता मूजब जिलावार स्हाबै किशतवाड़ च 67.75, डोडा लेई 66.42 फीसद, रामबन लेई 62.42 फीसद, उधमपुर च 70.76 ते जिला कठुआ च 70.06 फीसद रेआ। इस मौके 11 ज्हार चुनां कर्मी कोई 2 ज्हार 637 मतदान केन्द्रें च तैनात हे, एहदे च 19 पिंग मतदान केन्द्र बी शामिल न जित्थें महिला कर्मी तैनात हियां ते कोई 16 लक्ख 23 ज्हार मतदाताएं चा 11 लक्ख 7 ज्हार मतदाताएं अपने हक्कै दा इस्तेमाल कीता ऐ।

<><><><><><>

3rd Phase

लोकसभा चुनां दे त्रिये गेड़ लेई नामांकन आली प्रक्रिया जंदी रातीं मुक्की गई। इस गेड़ लेई मतदान 7 मई गी होना तैह ऐ।

10 राज्यें ते दऊं केन्द्री शासत प्रदेशें दी 94 लोकसभा सीटें पर मतदान होने न, जिंछै च अनंतनाग-राजौरी संसदीय हल्का बी शामिल ऐ, मतदान 7 मई गी होंगन। मेदवारें आस्सेआ चुनां मैदान थमां अपना नां सोमवारें तगर वापस लैता जाई सकदा ऐ।

<><><><><><>

NH-44

जम्मू श्रीनगर राष्ट्रीय जरनैली शिड़क एनएच-44 मेहद, गंगरू ते किशतवाड़ी पत्थर इलाके जित्थें कल भारी बरखा दे चलदे पस्सियां पौने कारण रस्ता बंद होई गेआ हा, उत्थें मलबा हटाइयै रस्ता खोलने दा कम्म जारी ऐ। लोकें गी हिदायत दित्ती गई ऐ जे रस्ता पूरी चाल्ली साफ नेई होई जाने तगर जरनैली शिड़कै पर यात्रा नेई करन। तोआई किशतवाड़-सिंथन, अनंतनाग ते भद्रवाह चम्बा शिड़क केई थाहरें बर्फ पेदी होने कारण गड्डिडएं दी आओजाई लेई बंद ऐ।

<><><><><><>

Samba

सांबा दे जिला चुनां अधिकारी अभिषेक शर्मा होरें बन्ने कन्नै लगने आले ग्राएं दा दौरा लाया ते इलाके दे मतदान केन्द्रें ते बंकरें दा जायजा करियै जिले च औने आले लोकसभा चुनां 2024 लेई तैआरिएं दी समीक्षा कीती। जिला चुनां अधिकारी होरें केई मतदान केन्द्रें दा बी दौरा कीता जिंदे च जी.एम.एस. मंगूचक्क, जी.एच.एस. सार्थिए ते पी.एस.चालयारी खौड-बी च स्थापत ग्रीन मतदान केन्द्र सनें रेन वाटर हारवेस्टिंग सुविधा ते सोलर प्लांट बी शामिल न। चुनां अधिकारी होरें अफसरें गी घटना दी स्थिति आकस्मिक रस्ते दा चार्ट पेश करने दे निर्देश बी दित्ते ते ईसीआई दे दिशा निर्देशों दी पालमा करने लेई आक्खेआ।

<><><><><><>

Odisha Tradeegy

ओडिशा दे झारसुगुड़ा जिले च महानदी नदी च इक किशती दे पलटोने दे हादसे च मरने आलें लोकें दी गिनतरी बधियै 7 होई गई ऐ। प्रशासन आस्सेआ सब्बै 7 लोथें दी पंछान कीती गई ऐ।

इक होर लापता महिला दा पता लाने लेई अजें बी बचाह अभियान जारी ऐ। तकरीबन 54 लोक इक हासदाग्रस्त किशती च सुआर हे, जेहड़ी कल ओडिशा दे झारसुगुड़ा जी दे लखनपुर थाहर कोल महानदी नदी च पलटोईं गेई ही। किशती च सुआर सारें लोक गोआंढी राज्य छत्तीसगढ़ दे रौहने आले हे।

<><><><><><>

Navy Vice Chief

वाईस चीफ ऑफ नावल स्टाफ वाईस एडमिरल दिनेश के. त्रिपाठी होरें गी भारतीय नौसेना दा अगली चीफ नियुक्त कीता गेआ। ओह इस म्हीने दी 30 तरीक गी सेवानिवृत होने आले एडमिरल आर.हरि कुमार हुंदे परैंत औंगन। नौसेना दे वाईस चीफ दा औहदा संभालने शा पैहले त्रिपाठी होरें पच्छमी नौसेना कमान दे फ्लैग आफिसर कमांडिंग इन चीफ दे तौरा पर कम्म कीते दा ऐ। वाईस एडमिरल त्रिपाठी होरें गी एंटी विशिष्ट सेवा मैडल ते नौसनो मैडल कन्नै बी सम्मानत कीता गेदा ऐ।

<><><><><><>